

junges theater basel - kurs diensttag 20h

leitung: christian mueller 076 87 07 81 / christian@diskowuerste.ch

technik: thomas frey

TITEL: Ìç# ß! ñø®/VÃ£ !!!

Proben Auffahrt: 9. - 12. mai je 10 - ca 18h (Mittagessen inklusive).

Proben Aufführungswoche: Di - Do: 18 - 22h.

Aufführungen: fr 17. / sa 18. / so 19. mai 2013; 20h. Ankommen zwischen 18h -18.30h

Spiilplätz: 12. - 15. juni. morgens/mittags Workshops; Abends Theater. Wir: 15.5: 22h

Mit: andrin haag, céline bitter, dounya zorzetti, elizabeth guo, joanna Kamm, kim Tschudin, larissa hage, lina eckert, louise bachelard, lucie anderrüti, lucy sarasin, malin hunziker, phillip schwerdt, sidar Atici, valentin Heim, xenia hofmeier.

Requisiten: 16 x blick am abend (aktuell), 16 x iPhone attrappe, schwere reisetaschen voll mit zeugs.

Kostüme: hawaii hemden, typisches buntes touristen zeugs, brillen, kameras, 16 Gürtel, 16 schuhe

anfang:

Ton: ambiance stadt:

alle ausser malin sind schon auf der bühne in den bildschirm ihres smartphones vertieft. alle laufen so rum, starren auf den bildschirm. einige mit kopfhörern. ganz für sich. wenn eine erste person ganz bei sich ist und sich unbeobachtet fühlt, macht sie irgendwas spezielles, was die anderen aber eigentlich eher nicht sehen sollten. eine art macke oder peinlichkeit. natürlich schauen genau dann alle zu, gerade als man sich besonders unbeobachtet fühlt. man wird entdeckt und schämt sich zutiefst.

larissa lacht und grunzt, alle halten an und schauen sie an. sie bemerkt es. schämt sich. läuft nach hinten weg. alle schauen nach, wenn sie bei der türe hinten ist, laufen alle wieder weiter.

dounya arsch frisst hose, sie richtet sich wieder. alle schauen. sie schämt sich, haut ab.

lucy sie niesst in die hände, streicht es an den hosen ab. alle schauen. ab.

phillip er singt baby von beiber zu laut. alle schauen. ab.

elli zieht choder rauf. alle schauen. schluckt ihn wieder runter. ab.

xenia bohrt in der nase. alle schauen. isst den bög. alle: weh. ab.

andrin spuckt an boden. alle schauen. er streicht den fuss auf dem boden. ab. klopft hinten unauffällig an die türe für malin.

malin öffnet türe. wenn sie wieder ins schloss fällt, halten alle an. schauen ihr nach. sie fühlt sich als supermodel. alle lachen, wenn sie auf ihrer höhe ist. sie dreht sich um, man sieht wcpapier aus der hose lugen. sie schämt sich, dreht sich um:

alle: mängisch.

valentin chummi mir so blöd vor!

lina als öb i nit normal wär.

joanna als öb ich gar kei mensch wär.

lucy als öb i dr letscht vollidiot uf dere wält bi.

xenia als öb i spinn!

louise als öb i die einzigi uf dere ganze behinderte wält bi, wo so komisch isch wie ich.

céline drbi hani doch immer welle drzue ghöre.
sidar immer nur welle eini vo oich si.
larissa eifach normal halt, so wie alli andere au!
alle so normal halt, wie dir!
schauen ins publikum, wie in einen halbtransparenten spiegel
dounya aaah, si gsehn mi!
lina sie luege widr so komisch.
lucie die meine sicher, ich sig e trottel.
phillip die luege jo *mi* ah.
alle hilfe!

sie rennen hysterisch rum und versuchen sich irgendwie dem rampenlicht/ der sichtbarkeit zu entziehen. was natürlich nicht wirklich gelingt. 1mal, 2mal, 3mal beim 4ten mal findet man eine gratiszeitung und versteckt sich hinter dieser. ellbogen nach aussen. man entdeckt ein inserat und alle nehmen gleichzeitig die zeitung langsam herunter und lesen die annonce vor:

alle:

fühlen sie sich nicht normal?

gehen ihnen ihre marotten auf den sack?

wollen sie endlich dazugehören?

wollen sie ein perfekt geöltes rädchen unserer leistungsgesellschaft sein?

eine perfekte zelle unseres gesunden volkskörpers?

dann melden sie sich noch heute für unser normalisierungs-seminar an!

unter 061 666 n-o-r-m-a-l ausrufezeichen

alle nehmen iPhone hervor, tippen nummer ein. rufen an.

tonspur:

tuut. tuut. herzlich willkommen bei der normal-life gmbh.

für deutsch drücken sie die 1. für franz...

alle: 1

für anmeldungen zu unserem *heimwerker klub*, drücken sie die 1.

für anmeldungen zu unserem *anonymen alkoholiker treff*, drücken sie die 2.

für anmeldungen zu unserem *insektenliebhaber-kurs*, drücken sie die 3.

für anmeldungen zu unserem *stegaleniker-workshop*, drücken sie die 4.

für anmeldungen zu unserem *jamaikanischen-skiclub*, drücken sie die 5.

für anmeldungen zu unserer *gorps-abc-schule*, drücken sie die 6.

für anmeldungen zu unserem *do it yourself zombie-lager*, drücken sie die 7.

für anmeldungen zu unserem *gangnam-style-tanz-kurs*, drücken sie die 8.

für anmeldungen zu unserem *facebookaccount für haustiere-informationsabend*, drücken sie die 9.

für anmeldungen zu unserer *morse-kurs*, drücken sie die 10.

für anmeldungen zu unserem *normalisierungs-seminar*, drücken sie die 11.

alle: eins eins..

sie haben sich 2mal für das *heimwerkerseminar* angemeldet.

falls sie die 11 für *normalisierungs-seminar* meinten, drücken sie die 11.

alle: eins eins!

sie haben sich erfolgreich für das (pause) *normalisierungs-seminar* angemeldet. vielen dank.

seien sie am (*datum der aufführung*) um 20.15 am flughafen. vielen dank.

alle: ahhhh. ändlich agmäldet. jez nur no dr termin in kaländer itrage. so.

iphone aus tasche. tiptiptip. iphone in tasche.

ton: sms geräusch. stimme: sie haben *eine* terminbenachrichtigung:

abflug normalisierungs-seminar in 5 minuten.

musik: ? was hektisches, zb prutaatata von afrojack oder benny hill theme: Yakity Sax by
Boots_ Randolph

alle: uaaaaaaah.

hektisch packen. warten:

alle zum flughafe!

reisen mit diversen fortbewegungsmitteln. (ca1-3stk). dazwischen einmal an der bahnschranke halten.

ton: zughupe, zug fährt durch, schranke hebt sich.

zug durchlassen. alle wieder chaotisch.

am check-in anstehen. checkin macht auf. tickets holen. durch sicherheitskontrolle laufen. schueh und gürtel abgeben. durchsucht werden. ins flugi gehen. durchsage:

tonspur:

sehr geehrte seminarteilnehmende. herzlich willkommen zum (andere stimme:)

normalisierungs seminar, der normal life gmbh. um die kosten des seminars

möglichst klein zu halten. werden sie sich in der gruppe selbst therapieren. das

seminar beginnt sofort nach der landung. keine angst wir lassen sie nicht im stich!

weitere anweisungen folgen auf der seminar-insel. im namen der better life gmbh

wünschen wir ihnen einen schönen aufenthalt! bis bald!

durchsage captain. ready 4 take off.

ton: bling (gurt schliessen), flugzeug startet. bling. (gurte auf)

ton: this is your captain speaking mix

flugsicherheits-choreo.

ton: bling. (gurte zu). landeanflug ist eher ein lande absturz. alle geraten in panik, beten, hyperventilieren. schreiben testament. knutschen ein letztes mal. gehen in hocke wie angewiesen. schnappen nach luft aus den sauerstoffmasken usw. landen. klatschen.

ton: bling. aussteigen. flugzeug nachwinken.

ton: flugzeug startet und fliegt ab.

ton: urwald /natur ambiance

sich begutachten. nichts sagen. auf koffer im halbkreis sitzen. versuchen zu sprechen. sich aber nicht getrauen.

man lächelt sich verlegen an. hm.

elli schöns wätter. he?

lucie jo. schono. sunne halt.

larissa jo aber dört hinde chömme scho es paar wolke.

sidar jo nei, die gön. glaub.

dounia was sin ächt das für boim?

phillip pinie. glaub.

xenia palme.

kim pinie und palme.

andrin palmpinie

céline also ich fang mol a: (2 schritte) hallo zämme

alle (schlapp) hoOoi!

céline schaut streng in die runde. stampft.

alle (motiviert) hoOoi!

céline hoi. ich bi 19ni. ha 2 schwestere. e älteri und e jüngerer und i bi nit normal.

lucy so abnormal isch jez das au widr nit.

malin jo aso ich bi e einzelchind.

lucy *das isch komisch!*
malin *wieso isch das komisch?*
lucy *aso mir si 8 chinder. und d mueter het uns alli elei ufzoge!*
malin *8 stück?! und denn het dr staat alles miesse zahle! schmarotzer!*
lucy *he! jetz schaffe aber alli 8 und zahles am staat widr zrugg! sälber schmarotzer!*
céline *(aufgebracht:) hallo, es got jez um mi! (beruhigt sich) ich bi d sayana. bi 19i. ha 2
schwistere. e älteri und e jüngerer und i bi in däm fall also normal.*
louise *hallo. ich bi d valentina. und ich bi sicher nit normal. ich bi sicher nit so langwilig
wie die! ich ha zwar bis jetzt noni vil erläbt, aber ich wird sicher mol pilotin, oder
füürspuckerin!*
joanna *pilotin? das isch doch nit speziell. speziell si höchstens dini chleider.*
louise *wie meinsch jez das.*
lucie *was sell an dene chleider speziell si? die sin höchstens speziell grusig.*
larissa *jetz höret mol uf oich gegesitig azmache. das isch e sälbsthilfe gruppe. do hilft me
sich. sälber! also ebbe nit elei, sondern alli zämme.
lueg, (holt sich phillip) dr durchschnittlich schwizer isch 1m 76 gross und heisst
stephan.*
phillip *jo do si mir aber grösser.*
andrin *und stephan heisst me au scho lang nüm.*
louise *und die durchschnittlich frau isch 1m 64 gross.*
kim *was? nur?*
lucie *was heisst do nur? ich wär froh, wenni no würd wachse.*
dounia *as frau chasch wenigstens stöggelischue alegge, denn bisch grösser.*
valentin *und was sell i mache?*
dounia *mach doch eifach e buggel.*
xenia *oder wird doch e frau.*
valentin *sau gueti idee. stopf dr doch sogge ine, denn gsehsch *du* wenigstens wie eini us.*
xenia *steck du dir doch sogge ine, denn gsehsch wenigstens wie e ma us.*
malin *ich find, eh es het vill zweini manne do. die hän au no nie vo dr quoteregelig ghört.*
phillip *aso ich finds ok do. tschau! (schleimt sich an eine ran).*
céline *hau ab du grusige, ich bi nit do ane cho zum flirte!*
lucy *das isch jez amfall au scho sexuelli belästigung. du sau!*
louise *jä, ab sofort, isch sexuelli belästigung, wenn e ma mit ere frau schwätzt.*
joanna *wenn e ma e frau aluegt!*
céline *wenn e ma an sex dänkt!*
elli *nei, wenn er an e frau dänkt!*
lina *wenn er überhaupt dänkt! das mache nur fraue!*
andrin *sone seich!*
larissa *het jez är?!?... het är jez?!... eifach... gschwätzt... mit ihre?!?! auf ihn!*
sie packen *ihn und drücken ihn an den boden. philip packt ihn an den füssen und schwingt ihn
im kreis. seiligump.*
valentin *he! das isch belästigung! löt mi los.*
lucie *chöne mer uns nit wenigstens einige, dass mer uns nit gegesitig d chöpf ischloh.
wär weiss, wenn das flugi widr zrugg chunnt. das ghört sicher nit zum seminar!
lassen von ihm ab.*
mehrere: *jo sorry. entschuldigung. nit so gmeint gsi...*
xenia *ich han e idee: ich bi mol inere sälbsthilfegruppe zum thema... ich ha mol *fründin*
gha, wo imene *ratgäberbuech* gläse het, dass me vil über sich und d fremd-
wohnrähmig vo sich cha lerne, wenn me sich in e tier versetzt. also: ich bi e
wunderschöne delfin, wo sich frei und unbeschwert im grosse ozean mit sine
delfinfründe vergnügt. wenni hunger ha, iss i e fisch, wenni schlofe wett, denn*

schlofi und wenn s mer langwilig isch, denn biss i amene fliegende fisch in schwanz und flieg übers meer.

joanna du erinnerisch mi meh an e seekueh!
malin oder e seeelephant. weisch die grusige viecher wo nur am strand ligge. und... grusig si.

elli und was bisch du für e tier? e stinktief?
malin wie chunnsch jez uf das?
elli wäg dr nase, wahrschinlich.
malin halt s muul, du rattegsicht.
elli ratte sin mega intelligänti tier. die chönne sogar lerne, wo si mien uf s wc go.
phillip uuuuuhhh. im gegesatz zu dir, oder wie?
elli was wärsch denn du für e tier.
sidar aso ich wär gärn elefant. keini natürliche feinde und so ne rüssel! (zeigt)
louise weisch jo gar nit was afange drmit.
sidar doch klar, mi absprütze.
einige lachen

sidar hach, mit wasser! und wenni heiss ha, denn gwagli mit de ohre und fächere mir chüeli luft zue. (fächert sich luft zu)

lucy als elefant frissisch jo nur so dornbüsch. und abligge zum schlofe chönne die au nit würllich. die schlofe nit meh als 4 stunde am stück. die würde süscht an ihrem eigene gwicht verstickte.

larissa denn bini also lieber e sibeschlöfer, da macht 7 mönet winterschlof! und sauhärzig sin die au.

céline ich will die muus us em europapark si. döffi?
andrin das isch kei ächti muus.
céline doch, e unächti muus mitemene ächte mensch dinn. und dä döf immer im europapark alli bahne gratis fahre.

louise jo und ich bin e einhorn und schiss rägeboge und wenni gorps denn verliebe sich 2 mensche in enand.

wer gorpsen kann, gorpst. (kim, philip, valentin, celine: entschuldigung)

lucie i glaub mir lön das mit de tier...
lina mache mer witer mit gegeständ?
joanna ich wär e bolzeschussgrät. weisch was das isch?
lucie i glaub au das lö mer lieber lo si... macht öper witer?
valentin aso i bi dr... stefan? und mis problem... ich schäm mi chli... mis problem isch, dass i... ich cha eifach mini... aso ich ha müeh mit... ich cha eifach mini sätz nit fertig... aso nur wenn i vor lüt... aso wenni nervös... denn chani eifach nüm...

larissa isch das alles? du bisch chli schüch und das sell es problem si? die meiste mensche sette so schüch wie du si, denn gäbs nit so vil mist uf dere wält. krieg und gwalt, oder muggestich. im oktober! im OKTOBER!!!

malin jo, oder wenn genau die geile schueh wo du wettsch, in dinere grössi usverhaaft si.

larissa oder e binestich im novämber! im NOVÄMBER!!!
lucy oder wenn d zahnpastatube nit uf em chopf stoht: das isch schlimm!
larissa oder schneeräge im dezämber! im DEZÄMBER!!!
phillip oder wenn me chrank wird, genau denn wenn d ferie afön. jedesmol.
louise dir händ doch alli e schade.
kim wäge was bini ächt do. ich mues normal wärde! NORMAL!
alle: ich au! (durcheininander)
joanna also: normal isch... wenn me uf d wält chunnt und schreit!
lina und schnuft.

joanna jo, zum schreie mues me schnufe.
phillip denn wird me normalerwis am ne gschlächt zueteilt. das isch normal.
elli also, denn bi ich jez e bueb!
phillip das chasch sicher nit sälber uswähle! du bisch e meitli.
elli vo wo weisch das? (zuerst hoch, dann tiefe stimme)
phillip das gseht me dank.
elli hee du spanner! (zuerst deckt sie oben und unten ab, dann nur unten)
elli bedeckt sich.
phillip was? nei, i mein langi hoor uf em chopf und keini hoor süscht.
elli aha! (kann sich wieder entspannen)
xenia also als baby het me au no fascht keini hoor, wie weiss me denn, was me isch?
phillip als baby bisch jo au no blutt. oder bisch du mit chleider uf d wält cho?
céline nei das hani mim mami nit wele atue.
lucie was atue?
céline jo mit chleider, dört use... halt uf d wält cho. das chlemmt doch.
larissa zum glück het me als neugeborenis no keini pearcing...
lucy also normal isch: d meitli hän langi hoor und d buebe keini, also churzi.
louise i glaub, do giz no anderi unterscheidigsmerkmal.
xenia jo, buebe spile mit auti und schlön sich ab, und meitli mit puppe und schwätze.
dounia boa isch das langwilig.
valentin und meitli hän rosaroti sache a und buebe blai.
andrin jo und buebe furze und meitli wüsse nit mol was das isch.
kim also oisi chatz het chönne furze... und das isch e wiibli gsi.
die anderen nehmen distanz zu ihr, und wedeln in der luft. halten die luft an.
kim was? was isch jetzt? ich ha sicher nit... das isch öper anders gsi!
malin d chatz??
alle schauen zu larissa
larissa ich bin e sibeschlöfer!
valentin und buebe chönne rächne und meitli schribe.
lina und wie schribe d buebe denn s resultat uf? das si doch alles nur klischees. was sell denn i mache? ich cha rächne drfür nit schribe. und bi trotzdem e meitli.
andrin jo, manne ässe nur fleisch und fraue si vegan und ässe höchstens e glas wasser.
valentin oder stecke sich noch em ässe dr finger in hals.
phillip und fraue gö immer mindestens z 2t uf s wc.
larissa jo d manne hän nur schiss, dass d kollege gsehn, wie chli ihres schnäbi isch.
andrin drfür chönne fraue nit parkiere.
lucy du chasch jo nit mol auto fahre.
andrin und ich ha keini hoor im gsicht und bi trotzdem e bueb.
lucy rasiere zellt nit.
andrin wieso rasiere sich denn d fraue?
lucy will me das so macht.
andrin me? wär isch 'me'? ich kenn dä oder die nit.
xenia was mir als männlich oder weiblich empfinde isch eh alles kulturell konstruiert, genau so, wie me nit dōf öffentlich über sini körperusscheidige rede oder über sex. scho gar nit wenn me jung isch! oder im theater. drbi gohts doch schlussendlich nur um das. so verloge.
phillip aber kunst isch doch e heili wält. dört will me doch ablänig vom böse alltag in dr erhabene und harmlose kunst finde, wo nüt mit em läbe z tue het.
joanna wenn du schwul wärsch, wärsch du sicher d frau in dr beziehig.
phillip jo und du dr ma bi de lesbe.
louise si mer jetzt au no homophob?

lucie jo und in andere kulture miesse d manne langi hoor ha und d fraue miesse s gäld verdiene.
 lina und s gäld isch au nit gerächt verteilt. mir si riich und anderi arm.
 sidar schuld do dra isch numme die neoliberali globalisierig vo de wältkonzärn mit ihre korrupte imperialistische regierige. es brucht e soziali globalisierig. demokratie und freiheit für alli. öb si wei odr nit.
 alle USA USA, internationale völkermordzentrale!
 louise das wär doch schön, wenn alli genau glich vil hätte. wenn alles genau glich gerächt verteilt wär. absolut demokratisch!
 alle jo! (hand in höhe strecken)
 kim wie willsch das mache?
 joanna stell dr vor, jede mensch bechunnt e insle...
 auf seine eigene kleine insel verteilen, hinsetzen, chillen.
 joanna wo jede genau glich vill land het.
 die gliche chleider...
 alle schauen die kleider von joanna an:
 alle weh!
 joanna glich vill sunne, glich warm, glich vil z ässe, glich vill huustier und so witer und so witer. alli läbe mit dr gwüssheit, dass es niene no öpis gibt, wo si nit sälber au hän. es isch alles genau gliich vrteilt.
 larissa i will aber kei zwitter si, mir gfallts als frau.
 céline wärsch denn eifach s halbe läbe e frau und die anderi hälfti wärsch e ma.
 elli wenn me nit weiss, wie lang me läbt. wie weiss me denn, wo d helfti isch?
 lucy denn halt: ei tag ma, ei tag frau. den widr ei tag ma, denn frau usw usw.
 louise geil, denn chani ändlich mol im stoh schiffe!
 céline ich würd mi name in schnee pinkle.
 valentin hoffentlich hesch kei lange: (kurze pause) anna preciosa penelope rosanna die 2ti von und zu guttenberg.
 phillip ich würd ändlich mol e bh welle alege. und tangas.
 larissa das isch gar nit so bequem.
 phillip ich weiss...
 valentin i würd mi dr gaaanzi obe lo ilade. und nüt zahle miesse.
 lucie ich würd e schlegerei avo! (pöbelt andere erfolglos an)
 elli ich mi bart kraule!
 andrin und ich würd e wisse rock azieh, und über e luftschacht stoh, wie d marilin monroe.
 louise das chasch au als schott mit emene kilt.
 lina interessant, chömme mer zrugg zum thema: alles glich verteilt: ei tag wäri sau riich und 100 johr arm.
 céline ich wär die erste 40 johr nichtraucher und denn wäri chetteraucherin.
 xenia e wc hätte mer denn aber au nur jede 2te tag.
 malin wieso?
 xenia will nur d helfti vo de mensche eis hän.
 alle wehh.
 xenia denn isch s rhybord aber au e entwickligsland...
 joanna so guet: 30 johr wäri chines, 30 johr wäri inder und dr räscht vo dr zit wär i all paar mönet e andere usländer.
 céline jo und ei monet wärsch denn in dr schwiz. meh nit.
 lina ich ha eh welle go reise: uf ägypte...
 springt auf die insel von jemand anderen (lucie)
 lucie uf brasilie...
 lucy uf russland...

andrin uf sri lanka...
 elli uf finnland...
 valentin uf burkina faso... (niemand weiss wo das ist) ähm.
 h hau ab, ich bi argentinie! (valentin sucht und springt zu dounia)
 dounia uuuf... kanada!
 sie springen noch ein wenig von insel zu insel
 larissa glich verteilt? glich verteilt? so ischs aber überhaupt nit. dr grabe zwüsche arm und riich wird immer grösser.
 phillip s privatvermöge, wo vo schwizer-banke vrwaltet wird, isch 3'000 billionen franken. das isch e drittel vom gesamte privatvermöge vo dr ganze wält. cha sich das öpper vorstelle? 1 promille vo dr bevölkerig verwaltet 30 prozant vom gäld: 3 trillionen franken. das isch e 3 mit 15 null hingen dra. cha me sich die zahl überhaupt vorstelle?
 céline wenn alli genau glich vill hän, isch das nit demokratisch sondern kommunistisch.
 louise isch dr kommunismus nit d ändlösing vo dr demokratie?
 xenia ändlösing? spinnsch?! wenn alli genau glich si, denn isch me in dr armee und denn gize chrieg. das isch eher faschistisch.
 sidar d mensche selle au nit genau glich si, sondern genau glich vill wärt. und die gleiche chance ha, wenn si uf d wält chömme. das wär denn wenigstens so gerächt wie möglich.
 xenia trotzdäm si e paar intelligäntr, anderi si besser im sinne...
 lucie anderi si schöner und nomol anderi chönne alles zämme. das isch eifach unfair.
 larissa as ob sinne und schön si s einzige isch, wo me mues im läbe erreiche.
 elli was mues me denn im läbe erreiche?
 sidar aso i will mol diktator wärde: hopp: gehorcht mir!
 joanna das chasch denn mit dine chindli mache, nit mit uns!
 dounia diktator? diktatore wärde immer irgendwann gstürzt! bam!
 sidar ich ha e zombiarmee, wo mi beschützt!
 alle werden zu zombies
 elli ich wett e pool im garte
 lucy ich 3000 facebook fründe
 larissa ich d liebi vom läbe finde!
 phillip und ich grad mehrmals d liebi vom läbe finde.
 valentin ich wett mol tennis spile
 céline blutt go schifahre
 lucie alles gäld usgäh, woni ha.
 xenia länger als 24stund im bett blibe.
 dounia ich wett mol e sklav ha - und e sklav si!
 joanna löst sich aus der zombie starre
 joanna aso ich wett scho alt wärde. und chinder wetti au. und am schluss schlofi ganz sanft i im kreis vo dr familie.
 louise also d schwester vo minere grossmueter isch bim schlittle in e stacheldroht gfahre und gestorbe. so het si sich das sicher nit vorgestellt.
 lucy weisch an was die meiste junge stärke: an sälbstmord.
 restliche zombies auch weg.
 larissa sälbstmord mach i höchstens wenn i alt bi.
 kim mängmol weisch eifach nüm witer.
 lina me het immer e wahl! me mues eifach traue, au mol widr bi null azfo.
 xenia ich würd alles nomol genau glich mache, wie jez. usser d brille bi fiemann chaufe.
 céline ich au. usser d brille natürlich bi fiemann chaufe.

lucie ich nit: ich würd vo afang a, mi brille bi fiemann chaufe.
 andrin du hesch doch gar kei brille.
 lucie ich würd se trotzdem dort chaufe.
 malin unseri multioptionsgesellschaft isch mer eifach vill z asträngend. immer mues me sich entscheide: nimm ich jez das shampoo mit honig und mandle, oder doch das mit aloe vera-extrakt? und weles isch am beste für d umwält?

phillip machi d matur oder e lehr?
 lina gang i nach links oder nach rächts?
 dounia machi s gliche wie mini eltere oder grad s gegeteil?
 joanna und weles zahnbürstli nimmi jez? das mit de weiche borste?
 lina das mit em gummiglänk?
 céline s rote?
 louise s blaue?
 lucy oder doch s wisse?
 valentin oder doch s elektrische?
 larissa und weles isch am beste für d umwält?!?
 lina und wie chömme die streife in d zahnpaste, ohni dass si sich vermische?
 sidar immer mues me sich entscheide. ständig. stand i am morge uf, oder blib i ligge?
 elli antwort a oder b oder doch c.
 xenia odr doch dr telefon joker?
 kim chum, mir spile s doch eifach mol dure: du wilsch doch d liebi vo dim läbe finde: das isch kandidat 1 (valentin), das isch s 2 (philipp) und das dr 3t (andrin).
 elli wär het gseit, dassi uf manne stand?
 kim denn isch das no die 4ti (louise).
 elli aso vo dr quoteregelig hesch au no nüt ghört.
 kim also denn gheisch du (andrin) use und du (celiné) muesch do ane cho.
 céline ich? wieso grad ich? ich ha doch scho e läbensabschnittspartner!
 elli kei angst, ich wähl di sicher nit.
 kim egal: nimmsch du kandidat 1, e guetusehende, sportliche ma. superintelligent, humorvoll, leider got er nach em erste chind fremd.
 oder kandidat 2: e sportliche, intelligänte, guetusehende ma, mega humorvoll und leider impotänt: also nüt mit chinderli, usser du gosch fremd. aber är findets use und verloht di und du bisch denn eleierzeihendi mueter und wirtsch tabletteabhängig.
 oder kandidat...

céline kandidatin!
 kim ahjo. kandidatin 3: si will keini chinder!
 céline doch!
 kim und wie sell das go?
 céline ich ha dank no es paar us dr erste ehe.
 kim aha. e gschideni... oder kandidatin nr 4 si isch au super, aber stirbt gli nach dem dir zämme cho sit.
 célie chani nit eifach s beste vo allne ha?
 alle nei!
 dounia oder wie wilsch dis gäld verdiene? (dazu nimmt sie immer beispiele aus der menge)
 wilsch du d matur mache, denn medizin studiere und 80 stunde in dr wuche lüt ufschneide? verdiene duesch zwar gnue, aber zit zum s gäld usgäh hesch gar nit.
 oder wilsch e lehr als metzger mache, und denn dr ganz tag im bell halbi säu usbeinle? und das als vegetarier?

oder will du zwill kiffsch hesch nach dr schuel, wirdsch schizo und läbsch dr räscht
vo dim läbe in dinere eigene wält und vo dr sozialhilf. ah, und als messie.

philip chani nit eifach glück ha?
alle nei!

louise und wo ane gangi in usgang? (locations immer mit musik, erst sprechen wenn
musik dupmfer und leiser wird)

valentin in d cargo-bar?

ton: jazz

alle machen cargo bar: links und rechts an krüpfle wie an einen bartresen. auf english beer
bestellen und miteinander anstossen und vis a vis auch: cheeeers!

celine jo nei das isch doch mega tüür dört und alli schwätze änglisch.

dounia drfür chasch grad am rhy sitze und 'claudia ich liebe dich' läse. so romatisch.

lina das isch imfall e kunstwärk.

louise was? i ha gmeint, das sig ächt.

lucy aber dört hets numme so alti lüt.

andrin bisch schomol uf em manne-wc gsi? alles voll vrspiegelt. bim pisse spieglich di
hundert tuusig mol in de spiegle.

céline i cha nit, wenn mr öper zueluegt.

phillip denn gangi halt ins soca!

musik: rock/hiphop

alle machen soca: rock/hiphopkonzert: alle vorne an die bühne, hand in die höhe. wippen wie
an rock/hiohopkonzert.

lucy dört si doch alli so jung. und bsoffe.

louise dört gön doch nur so skaters ane und hip hopper. so swagers.

larissa aso ich find s voll isi dört. was heisst überhaupt swag?

andrin Secretly We Are Gay.

larissa waaaaas? denn gani halt in s nordstärn!

musik: nordstern (techno)

alle machen nordstern: laufen mit ausgestreckten armen in der dunkelheit rum.

valentin dört isch s doch immer so dunkel.

lucie dört isch dr itritt jo scho sau tüür! usser du bisch immerkommer.

andrin du döfsch eh noni ine du bisch z jung

lucy am donnstig ischs gratis.

phillip dört si doch alli voll uf droge. immer.

lina immer dä techno und vill z luut.

louise denn gangi halt ins singerhuus.

musik: r n b.

alle machen singerhuus: hinten 70ies fingerzeig, vorne 2x2: grosse frau vorne, kleiner 'mann'
hinten, am hüfttanzen. rest gumpt so ententanzähnlich-tussig rum. jemand macht
partyfotos für laut und spitz, posieren, wenn sie kommt.

lucie wo isch das?

sidar grad bim märtplatz. weisch sone alts bordell.

lucy e alts buff? das isch huere sexistisch dört. mit all dene brüst-statue.

phillip und nur so kanake und studänte. so studänte kanake.

xenia sit wenn giz den das?

kim denn halt ins sud.

alle pssst! s isch z lut!

larissa denn halt in d darumba.

musik: salsa, danach musikbrei.

alle spielen darumba: salsa tanzen, ein paar schritte.
 louise ins borderline.
 alle spielen borderline: alle sehr schwach auf den beinen, (jeeeee: aaaafterauer...)
 joanna in hinterhof!
 alle spielen hinterhof: sprung mit drehung, auf hintern tätschen.
 lucie in d jägerhalle!
 alle spielen: jäger.
 elli in d mitti!
 alle gehen in die mitte. xenia kämpft sich unten durch die beine durch.
 xenia nei. mir gön an e savage! weisch, sone riisigi illegali party imene still gleite spital
 oder ere halle, oder so. tausigi vo lüt. so mit ibräche, verbarrikadiere und d sau
 use loh. bis d halle brennt und lüt vom dach gheie. und am schluss isch d party so
 extrem, dass alles zämme gheit. d party vom johr! d party vom jahrzähnt! d party
 vo dim läbe!
 alle DAAAAAS ISCH MOL E PARTYYYYYYYY!
 erregt an party rennen und dann freeze.
 lucy jo und am schluss sitzisch doch elei dehei und luegsch fähnseh.
 alle setzen sich vor den fernseher. gelangweilt.
 valentin wer wird millionär. 20 ab 4i stellig. weiss scho.
 zap
 xenia southpark: kenny isch gstorbe. scho widr.
 zap
 lina tagesschau. krieg. kenni scho.
 zap
 larissa berlin tag und nacht.
 kopf fällt schlafend nach unten.
 céline tatort. dr gärtner ischs gsi.
 zap
 lucy jackass. jez lot er sich mitemene wc-hüsli in d luft spicke. scho widr.
 zap.
 plötzlich alle wach:
 andrin uh. d megan fox!
 sidar was findsch an dere toll?
 andrin ihri... mimik!
 zap
 larissa uh dr jonny depp!
 louise d vanessa paradis as frau!
 larissa die sin gschide.
 louise no besser!
 zap
 elli dr chuck norris!
 céline wenn dr chuck norris ins wasser gheit, wird er nit nass, s wasser wird chuck norris.
 lucie schauspieler muesch si! denn chasch immer wider öper anders si. hauptsach nüm
 mi. weisch, so james bond: d wält rette und so!
 lucy james bond? dä het no nie e feshti fründin gha. het keini chinder. und döf nie uf s
 wc, oder hesch dä schomol am sch... uf em wc gseh?
 spielt james bond nach wie er auf s klo geht: mein name ist bond, james bond. ffffffff.
 entschuldigung.
 malin denn halt d romy schneider, also d sissi!
 céline d sissi isch kokainsüchtig gsi und isch in gänf verschosse worde.

xenia und d romy schneider isch anere überdosis medikamänt gstorbe.
dounia denn halt d dr michael jackson...
lina was? e pädophile, wo sich vomeme schwarze ma ine wissi frau vrwandelt het?
phillip das si doch alles nur behauptige. dr michael isch mi held.
louise dr elvis presley!
kim härzinfarkt. mit 42i? glaubsch jo sälber nit..."
céline kennsch dr club 27. vill beriemti lüt si mit 27i gstorbe: dr curt cobain, d amy winehouse, jim morrison, jimi hendrix und no meh wo me hüt gar nüm kennt.
lucy jo und d lindsey lohan.
dounia die läbt no.
larissa aber nüm lang.
valentin jo und dr kenny vo southpark au nit.
joanna das isch e trickfilm.
sidar chame eigentlich nit berühmt wärde und normal stärke?
alle nei!
alle sind muff. muff choreo.

musik: zombie nation: attic sundays

16x schulter hoch ziehen, 16x blicke l&r, 16x die hinteren laufen vor, umkreisen zurück, 16x die vorderen laufen zurück, umkreisen. stämpfen: je 4mal 8 mit beinwechsel, nach hinten drehen, wieder im zickzack: beugen: hinterer reihe nach vorne, vordere nach hinten beugen. nach 8 schlägen mit blick nach vorne. bei musikwechsel umdrehen nach vorn, arme bambelen und vornüber beugen. blick hoch und muff.
louise wenn bini jez ändlich normal? bini scho normal?
alle nei!
lucie bin i scho normal?
alle nei!
lucy mann! werum bini nit normal. i ha doch immer nur eini vo oich welle si. ich will doch numme das alles, wo dir au händ: e normals, guets läbe. wenn me nämlich normal isch, denn cha s eim au nie sau schlächt go.
lina jo, aber au nit sau guet.
larissa ganz normal si, das isch doch denn, wenn me eifach funktioniert. wenn eim alles egal isch. wenn me meh maschine als mensch isch. wenn me sich an alli regle haltet, wo s git!
joanna immer 2 schueh alege! (dabei immer finger hoch nehmen)
phillip nie mit stöggelischueh in usgang!
andrin natel im theater abmache!
céline nit mit fremde manne ins auto stige, au wenn si jungi härzigi chätzli dehei händ!
dounia keini drinks vo fremde anäh!
lucie keini fremde hünd alänge!
phillip bim schwätze nit uf d brüst starre!
lina nit in dr zitig vo fremde lüt mitläse!
alle ä ä äh! (so mit finger, hin und her)
sidar nit spucke!
valentin nit in fremde schublade wüehle!
kim nit stähle!
alle und nie nie nie nie nie nie nie:
lina anderst si als alli andere!
alle ä ä äh! (so mit finger, hin und her. dann finger runter)
larissa so vil regle. so vil gsetz. mach das! mach jenes! und mach das ganz sicher nit!
malin ich ha angst, ich schaffs nit.
lucy ich ha angst vor em läbe.

sidar nur wenni normal bi, mues i kei angst ha. denn bini jo so wi alli.
xenia i ha eifach angst, ich bi nit normal. isch das normal?
lucie oh, s flugi chunnt!

ton: flugi

grosse aufregung

alle jeeeeee!

celine/elli i weiss aber nit, öbi zrugg wett! BLACK